

Euromediterranea: I davegnir che volassane

Te l'event endrezà a Busan da la Fondazione Alexander Langer l'é stat rejonà de la situaziuns tel mond e del problem de la migrazions, per vardèr con eie desferent al raion euro-mediterran

Busan - L. Sudtirolo l'é storicamenter tera de passaje e de confins, de azet e de convivenza, e l'é ence la tera de Alexander Langer, che à semper metù chisc temes al zenter de sia vita e de sia azion politica. La Fondazione che porta sie inom, e che à sia senta apontin jun Busan, à portà dant chisc temes ti dis passé te la Kolpinghaus a Euromediterranea, l maor event publich de la Fondazione, che vegn endrezà duc i egn ti prumes dis de messèl. Chest an à troà lèrga soraldut l problem de la migrazions, te chisc tempes che a nivel european se auza mures, per vardèr con eie desferent al raion euro-mediterran.

L Mediteran, confin sud de l'Europa, l'é doventà defat na gran fossa: demò ti prumes meisc del 2016 l'é stat passa 2500 morc e dal 1998 passa 32.000 persones à perdù la vita o é desvanides, tel chierir de passèr i confins europeans. N "genocidio de l'indifferenza" sun chel che no se pel seghitèr a serèr i eies.

"L'é n gran besegn, te l'Europa e tel mond, de ejempies positives, de strèdes che porta a l'integrazion, a la democrazia, a la pèsc, a la giustizia sozièla e ecologica. L'Union cogn esser n ejempie positif, zenza desciarièr i cosé e i peisc sui etres. Na Europa de fradaa e azet, che poje sia legitimità e credibilità sul consens di zitadins: chi che chier fora l'integrazion



piutost che la des-integrazion, l'unità politica e no demò l gran marcià, la giustizia sozièla e l'ambient più che l crescer e la competizion".

Coscita scrivea del 1995 Alexander Langer, che jà enlouta aea identificà anter la maor endesfides de l'Europa l ruol positif che l'Union aessa podù jìer per la pèsc, la democrazia e la costruzion de n spazie euro-mediterran avert e solidar. Chesta endesfides é tras maores anchecondi con l'imigrazion de jent che chier neva ocajions de vita, che sciampa da veres, crises economiches e ambientèles, violaziuns di deric umegn.

La Fondazione Alexander Langer à troà, arvejinà e scontrà te chisc egn tropa persones e sociazions che se dèsc jù en pruma linia per

la pèsc, la ledeza, la defendura di deric umegn, de l'ambient, de la razes. Persones amò atives che à moscià de saer dèr contribuc emportanc te situaziuns de conflit, col spirit de la no-violenza e di frabicanc de pènts. I pesé Langer é doventé "ciampanie de alarm" de chel che merita atenzion da pèrt de chi che à consaputa del fon leam anter chel che sozet te cèsa noscia e chel che enveze sozet te lesc che somea dalonc. E n muie de chi che ti egn aea ciapà chest pest à tout pèrt a Euromediterranea 2016.

L'event à vedù la partezipazion anter i etres de don Elio Sommayilla de Moena, pest Langer del 2008, da egn empegnà te la Somalia tel villaje de Ayuub e te la sociazion "Water for life" che envia via projec per la costruzion de poc per portèr l'èga te l'Africa subsahariana, olache suta e ciaresties l'é anter la rejons de la migrazions envers l'Europa a l'enrescida de na vita miora. Don Elio à dit che te l'evoluzion de la situazion te la Somalia se podea lejer duc i elemenc che dapò se à slarià fora te dut l Medie Orient: chisc l'é i resultac de egn e egn de politica vercia da pèrt di stac de l'Europa.

A Euromediterranea à tout pèrt ence l senator Francesco Palermo, segur "europeist" e president de la Convenzion chèder per la protezion de la mendranzes naziòneles del Consei de Europa, che à rejonà de limic e de endesfides de l'Europa che volassane per l davegnir. (lg)



Momenc de Euromediterranea 2016 a Busan, con la partezipazion de don Elio Sommayilla, de Francesco Palermo e de autra personalitèdes che ti egn passé à ciapà l Pest Alexander Langer.